



Մ Ա Յ Ր Ա Թ Ո Ռ Ո Ւ Մ

1964 թվականի դեկտեմբերի 12-ին, շաբաթ, «Տօն Սրբոյն Յակովբայ Մծբնայ հայրապետին»:

Մայր Տաճարում պատարագեց արժանապատիվ Տ. Հակոբ քահանա Հակոբյանը:

Դեկտեմբերի 12-ին, շաբաթ, Մայր Աթոռ ժամանեց Մոսկվայում Եթովպիայի դեսպան պր. Միքայել էմրուն:

Երևանի օդանավակայանում, հանուն Ամենայն Հայոց Վեհափառ Հայրապետի, հարգարժան հյուրին դիմավորեցին գերաշնորհ Տ. Ասողիկ եպիսկոպոս Ղազարյանը, հոգեշնորհ Տ. Մեսրոպ վարդապետ Պալլանը և դիվանապետ պր. Ն. Առաքելյանը:

Մեծահարգ դեսպանը, հետմիջօրեի ժամը 2-ին, պաշտոնապես այցելեց Ամենայն Հայոց Վեհափառ Հայրապետին և ջերմ զրույց ունեցավ նրա հետ՝ 1965 թվականի հունվարին Ադդիս-Աբեբայում կայանալիք միջկենդեցական ժողովին Ամենայն Հայոց Հայրապետի գլխավորությամբ Հայ Եկեղեցու պատվիրակության մասնակցության մասին:

Հարգելի դեսպանը Ամենայն Հայոց Վեհափառ Հայրապետին հանձնեց Եթովպիայի Կայսր Նորին Վեհափառություն Հայլե Սելասիե Ա-ի պաշտոնական գիրը, ինչպես նաև Եթովպական Եկեղեցու Պատրիարք Նորին Սրբություն Աբունա Վասիլիոս Բ-ի նամակը՝ վերոհիշյալ ժողովին վերաբերյալ:

Առաջին տեսակցությունից հետո, ժամը 3-ին, հարգելի դեսպանը սեղանակից եղավ Ամենայն Հայոց Վեհափառ Հայրապետին:

Դեկտեմբերի 13-ին, կիրակի, Մայր Տաճարում պատարագեց հոգեշնորհ Տ. Մուշեղ վարդապետ Պետիկյանը:

Սուրբ պատարագին ներկա էին Վեհափառ Հայրապետը և Եթովպիայի հարգարժան դեսպան պր. Միքայել էմրուն:

Ժամը 3-ին, Վեհափառում, հարգելի հյուրի պատվին տրվեց ճաշկերույթ, որին մասնակցում էին գերաշնորհ Տ. Սահակ, Տ. Վարդան, Տ. Ասողիկ, Տ. Վահան, Տ. Տիրայր սրբազանները, հոգեշնորհ Տ. Մուշեղ, Տ. Մեսրոպ, Տ. Արսեն և Տ. Նարեկ վարդապետները, Գերագույն Հոգևոր Խորհրդի անդամ պր. Գ. Բեքմեդյանը, դիվանապետ պր. Ն. Առաքելյանը և «Էջմիածին» ամսագրի խմբագիր պր. Ա. Հատիտյանը:

Ճաշկերույթին ներկա էին նաև Հայկական ՍՍԽ Մինիստրների սովետին առընթեր Հայ Եկեղեցու զործերի խորհրդի նախագահ պր. Կ. Դալլաքյանը և տեղակալ պր. Ս. Հովհաննիսյանը:

Ճաշկերույթին անցավ ջերմ, բարեկամական մթնոլորտում:

Ամենայն Հայոց Վեհափառ Հայրապետը, պր. դեսպանը և պր. Դալլաքյանը ողջունի բարեմաղթություններ կատարեցին:

Ժամը 5.30-ին, Ամենայն Հայոց Վեհափառ Հայրապետը երկրորդ տեսակցություն ունեցավ պր. դեսպանի հետ:

Դեկտեմբերի 14-ին, երկուշաբթի, հարգելի դեսպանը հրաժեշտ առավ Ամենայն Հայոց Վեհափառ Հայրապետից և մեկնեց Մոսկվա:

Հանուն Ամենայն Հայոց Վեհափառ Հայրապետի, հարգելի դեսպանին ճանապարհեցին գերաշնորհ Տ. Ասողիկ եպիսկոպոսը, հոգեշնորհ Տ. Մեսրոպ վարդապետը և պր. Ն. Առաքելյանը:

Պր. դեսպանը, Մայր Աթոռում գտնված օրերին, այցելեց Մայր Տաճար, Եկեղեցական արվեստի թանգարան, Հոգևոր Ճեմարան, Մայր Աթոռի տպարան, ինչպես նաև ծանոթացավ մայրաքաղաքի տեսարժան վայրերին և եղավ Երևանի Մեսրոպ Մաշտոցի անվան պետական Մատենադարանում:

Դեկտեմբերի 27-ին, կիրակի, Մայր Տաճարում պատարագեց հոգեշնորհ Տ. Արսեն վարդապետ Բերբերյանը:

Սուրբ պատարագին ներկա էր Վեհափառ Հայրապետը:

**

Դեկտեմբերի 31-ին, հինգշաբթի, Մայր Աթոռ Ս. Էջմիածին ժամանեց Մոսկվայում Եթովպիայի դեսպանատան քարտուղար պրոֆ. Գորգի Թաթֆեհտը և տեսակցություն ունեցավ Վեհափառ Հայրապետի հետ՝ Ամենայն Հայոց Կաթողիկոսի գլխավորությամբ Հայաստանյայց Առաքելական Եկեղեցու պատվիրակության 1965 թվականի հունվարի 16—22-ին Ադդիս-Աբեբայում կայանալիք Արևելքի և Արևմուտքի ուղղափառ եկեղեցիների միջեկեղեցական ժողովի մասնակցության հարցի շուրջ:

**

1965 թվականի հունվարի 1-ին, ուրբաթ, Մայր Տաճարում տարեմտի պատարագը մատուցեց և քարոզեց Մայր Աթոռի լուսարարապետ գերաշնորհ Տ. Ասողիկ եպիսկոպոս Ղազարյանը՝ «Փող հարէ ի գլուխս ամսոց, յաւուր նշանաւորի տարեկանաց մերոց» բնաբանով: Սուրբ պատարագին ներկա էր Վեհափառ Հայրապետը: Հավարտ սուրբ պատարագի, կատարվեց հայրապետական մաղթանք:

**

Հունվարի 3-ին, կիրակի, Մայր Տաճարում պատարագեց հոգեշնորհ Տ. Գևորգ արեղա Սերայդարյանը: Սուրբ պատարագին ներկա էր Վեհափառ Հայրապետը:

**

Հունվարի 5-ին, երեքշաբթի, «Ճրագալոյց Սննդեան և Աստուածայայտնութեան Տեսան մերոյ Յիսուսի Քրիստոսի»: Մայր Տաճարում պատարագեց լուսարարապետ գերաշնորհ Տ. Ասողիկ եպիսկոպոս Ղազարյանը: Սուրբ պատարագին ներկա էր Վեհափառ Հայրապետը:

**

Հունվարի 7-ին, հինգշաբթի «Յիշատակ մեռելոց»: Մայր Տաճարում պատարագեց հոգեշնորհ Տ. Խորեն վարդապետ Էլշուշյանը: Հավարտ սուրբ պատարագի, կատարվեց հոգեհանգիստ «վասն համօրէն ննջեցելոց»:

**

Հունվարի 10-ին, կիրակի, Մայր Տաճարում, պատարագեց լուսարարապետ գերաշնորհ Տ. Ասողիկ եպիսկոպոս Ղազարյանը:

Ամենայն Հայոց Վեհափառ Հայրապետի բարեհաճ կարգադրությամբ, պատարագի սրբազանը կուսակրոն քահանա ձեռնադրեց Հոգևոր Ճեմարանի շրջանավարտներ Ժիրայր սարկավազ Գալփաքյանին և Հակոբ սարկավազ Պարոնյանին, վերանվանելով առաջինին Ոսկան արեղա և երկրորդին՝ Զարեհ արեղա:

Խարտավիլակության պաշտոնը կատարեց հոգեշնորհ Տ. Մեսրոպ վարդապետ Պալյանը: Քահանայական կոչման արարողությունը տեղի էր ունեցել նախորդ օրը, հունվարի 9-ին, կիրակամտի ժամերգությունից հետո, հանդիսադրությամբ գերաշնորհ Տ. Ասողիկ եպիսկոպոսի:

Ձեռնադրությունից հետո, շնորհաբաշխ լուսարարապետ սրբազանը հորդորական խոսք ուղղեց նորապսակ արեղաներին, կոչանելով, որ նրանք լիակատար նվիրմամբ ծառայեն Հայաստանյայց Առաքելական Եկեղեցուն:

Ձեռնադրության արարողության ներկա էր Վեհափառ Հայրապետը:

Երեկոյան, Մայր Տաճարում, տեղի ունեցավ նորընծա արեղաների վեղարի օրհնության արարողությունը:

**

Հունվարի 11-ին, երկուշաբթի, Մոսկվա մեկնեց Ամենայն Հայոց Վեհափառ Հայրապետը, ուղևորվելու համար Ադդիս-Աբեբա, գլխավորելով Հայ Եկեղեցու պատվիրակությանը, Եթովպիայի Կայսր Նորին Վեհափառություն Հայլե Սելասիեի նախաձեռնությամբ հունվարի 16—22-ին կայանալիք Արևելքի և Արևմուտքի ուղղափառ եկեղեցիների միջեկեղեցական ժողովում:

Վեհափառ Հայրապետին ուղեկցում էին Վրաստանի հայոց առաջնորդ գերաշնորհ Տ. Կոմիտաս եպիսկոպոս Տեր-Ստեփանյանը, «Էջմիածին» ամսագրի խմբագիր և Հոգևոր Ճեմարանի դասախոս Ա. Հատիտյանը և գավազանակիր հոգեշնորհ Տ. Արսեն վարդապետ Բերբերյանը:

Երևանի օդանավակայանում Վեհափառ Հայրապետին ճանապարհեցին Մայր Աթոռի միաբաններ, Գերագույն Հոգևոր Խորհրդի և վերստուգիչ հանձնաժողովի անդամներ, վանքի պաշտոնյաներ, Արարատյան թեմի հոգևորական դասը և թեմական խորհուրդը՝ փոխանորդ գերաշնորհ Տ. Վահան եպիսկոպոս Տերյանի գլխավորությամբ:

Վեհափառ Հայրապետին ճանապարհեց նաև Հայկական ՄՍՄ Միներստրոնների սովետին առընթեր Հայ Եկեղեցու գործերի խորհրդի նախագահի տեղակալ Ս. Հովհաննիսյանը:

